

Un master par insegnâ in lenghe furlane

Te zornade de Fieste de Patrie, ai 3 di Avrîl aes 11 di matine, te aule 12 al prin plan di Palaç Antonini a **Udin** al vignarâ presentât ancje il Master universitari di II nivel/Cors di inzornament «Insegnâ in lenghe furlane», promovût de Universitât dal Friûl cul sostegn de Agenzie regionâl pe lenghe furlane. Ativât pal an academic 2007/2008, de durade di 21 mêis pal valôr di 60 credits formatîfs universitaris, al scomençarâ ae fin di Avrîl di chest an e si sierarâ tal Dicembar dal 2009. Al master a puedin notâsi ducj chei che a àn un titul di lauree magjistrâl o une lauree di vecjo ordenament o un diplome di scuele secondarie e che tal moment de presentazion des domandis a dimostrin di jessi o di jessi stâts in servizi in struturis educativis. E covente une cognossince almancul orâl de lenghe furlane. Lis domandis a varan di rivâ dentri dai 7 di Avrîl ae Ripartizion didatiche, seziôn Servizis ai students e ai laureâts, in vie Mantica 3 a Udin.

Il profil professionâl che si larâ a definî al è chel di un do-cent in stât di planificâ e di davuelzi l'insegnament de lenghe furlane integrant il svilup de competence linguistiche cu la maturazion di cognossincis disciplinârs, di capacitâts operativis e di une efetive competence plurilengâl e pluricultural. Par vê plui informazions si pues contatâ la Ripartizion didatiche dal Ateneu o consultâ il Manifest dai studiis ae direzion: http://www.uniud.it/didattica/post_laurea/master/secondo